



Broj/Број: 01,2-50-1-2-32/06
Sarajevo/Сарајево: 31.01.2006.

ZAPISNIK

32. sjednice Komisije za vanjske poslove

Sjednica je održana 30.01.2006., s početkom u 13,30 sati.

Sjednici su prisustvovali sljedeći članovi Komisije: Martin Raguž, Milorad Živković, Sead Avdić, Izet Hadžić, Nenad Mišić, Vinko Zorić, Azra Hadžiahmetović i Jelina Đurković.

Nije bilo odsutnih članova Komisije, izuzev gde Seade Palavrić kojoj je zbog imenovanja za sudiju Ustavnog suda BiH automatski je prestao mandat zastupnika u ZD PSBiH, pa tako i člana Komisije za vanjske poslove. Do ove sjednice nije imenovan novi član Komisije.

Sjednici je prisustvovao i pozvani gost, predstavnik Ministarstva vanjskih poslova BiH, Radomir Bogdanović, šef Odsjeka za međunarodno pravne poslove.

Zapisnik je vodila Merdžana Iglica, sekretar Komisije, i studenti-stažisti: Edina Harbinja i Alma Kurtalić.

Predsjedavajući Komisije Martin Raguž predložio je sljedeći:

DNEVNI RED

1. Usvajanje Zapisnika sa 31. sjednice Komisije za vanjske poslove Zastupničkog doma Parlamentarne skupštine BiH, održane 16.01.2006.;
2. Izbor drugog zamjenika predsjedatelja Komisije za vanjske poslove umjesto dosadašnje zastupnice Seade Palavrić, kojoj je prestao mandat u PSBiH;
3. Komentari i primjedbe o prijedlogu Radnog plana Komisije za vanjske poslove u 2006. godini sa Izvještajem o radu Komisije u 2005.godini;
4. Davanje suglasnosti za ratificiranje:
 - a) Općeg sporazuma o privrednoj, investicionoj, tehničkoj, kulturnoj, sportskoj i omladinskoj suradnji između Vijeća ministara BiH i Vlade Kraljevine Saudijske Arabije;
 - b) Protokola o suradnji između Vijeća ministara BiH i Vlade Republike Turske;
 - c) Okvirnog ugovora o kreditu između BiH i Razvojne banke Vijeća Europe;
 - d) Konvencije Ujedinjenih naroda protiv korupcije;
 - e) Konvencije Vijeća Europe o kibernetičkom kriminalu;
 - f) Dodatnog Protokola Konvenciji o kibernetičkom kriminalu, a u vezi kažnjavanja djela rasističke i ksenofobične prirode počinjenih putem računarskih sustava;
 - g) Sporazuma o tehničkoj suradnji između Vijeća ministara BiH i Vlade Japana.
5. Tekuća pitanja.

Predloženi dnevni red je jednoglasno prihvaćen.

Ad.1. Zapisnik sa 31. sjednice Komsije za vanjske poslove ZD PSBiH usvojen je jednoglasno.

Ad.2. Umjesto dosadašnjeg drugog zamjenika predsjedatelja Komisije, gđe Seade Palavrić, kojoj je prestao mandat u PSBiH nakon izbora za sudiju Ustavnog suda BiH, na mjesto drugog zamjenika jednoglasno je izabran gđin Izet Hadžić.

Ad. 3. Predsjedatelj je upoznao članove Komisije da nije bilo primjedbi niti sugestija u pisanoj formi na Radni plan za 2006., koji je sačinila sekretar Komisije, gđa Iglica, te da misli da je Radni plan dobar i da su jasno definirani prioriteti za 2006. godinu. Potom je gđin Raguž sugerirao sekretaru Komisije, da do iduće sjednice izradi precizni prikaz posjeta, s naglaskom na rokove, destinacije i izvodljivost. Na to je sekretar komisije odgovorila da je prikaz priložen uz Radni plan za 2006., te da je dinamika posjeta prikazana po kvartalima.

Gđa Đurković je, uzevši riječ, upoznala Komisiju s inicijativom Ambasade BiH u Grčkoj o formiranju parlamentarne grupe prijateljstva između parlamenata Grčke i BiH. Gđin Raguž je odgovorio da smatra da je ovo pitanje već definirano, obzirom da postojeće grupe prijateljstva obuhvaćaju više zemalja, te da nije potrebna posebna grupa. Gđa Iglica je podsjetila članove Komisije da je ova Komisija već dala svoje sugestije u vezi sa Prijedlogom pravilnika o uspostavljanju grupa prijateljstva sa drugim državama, ali da se Kolegij oba doma još uvijek nije izjasnio po ovom pitanju niti je konsultirao klubove zastupnika koji će dati imena kandidata za pojedine grupe prijateljstva. Predsjedatelj Komisije je zatim rekao da će na sljedećoj sjednici Kolegija kandidirati ovo pitanje sastava grupa prijateljstva. Komisija je potom bez primjedbi i sugestija jednoglasno usvojila Radni plan za 2006. godinu.

Ad. 4. Zatim se prešlo na 4. tačku Dnevnog reda, davanje prethodne suglasnosti Komisije na gore navedene sporazume, konvencije i ugovore. U vezi s Općim sporazumom o privrednoj, investicionoj, tehničkoj, kulturnoj, sportskoj i omladinskoj suradnji između Vijeća ministara BiH i Vlade Kraljevine Saudijske Arabije, gđa Iglica je upoznala Komisiju da je izvjestilac za ovaj sporazum, gđa Hadžagić ispred Ministarstva civilnih poslova BiH, dolazila u 9,30, što je bio prvobitni termin održavanja sjednice, te da zbog opravdanih razloga nije mogla doći na ovu sjednicu. Potom je gđa Iglica pitala članove Komisije da li se slažu da ona pročita saopćenje o sporazumu, koje je gđa Hadžagić dostavila. Uz odobrenje Komisije, gđa Iglica je pročitala saopćenje. Uzevši riječ, gđin Bogdanović je naglasio da je ovo uobičajeni sporazum o tehničkoj suradnji s jedinom razlikom što je multidisciplinarnan, jer obuhvata i privrednu, investicionu, omladnsku suradnju između dvije zemlje. Na pitanje gđina Raguža o tome ko je nadležan za implementaciju ovog sporazuma, gđin Bogdanović je odgovorio da je nadležno Vijeće ministara BiH. Komisija je jednoglasno dala prethodnu suglasnost za ratificiranje ovog općeg sporazuma.

U vezi s drugim sporazumom, Protokolom o suradnji između Vijeća ministara BiH i Vlade Republike Turske, gđa Iglica je podsjetila članove Komisije da je prošli put ovaj sporazum skinut s dnevnog reda sjednice usljed odsustva izvjestioca ispred Ministarstva vanjske trgovine i ekonomskih odnosa BiH, te da ni ovaj put nema izvjestioca obzirom da se Ministarstvo vanjske trgovine i ekonomskih odnosa oglasilo nenadležnim za ovu materiju. Gđin Bogdanović je zatim uzeo riječ i rekao da je ovaj sporazum prošao sve potrebne procedure te da se i ovdje radi o uobičajenom sporazumu o suradnji između dvije vlade, te da se bespotrebno čekalo na ostatak procedure. Komisija je nakon toga jednoglasno dala prethodnu suglasnost za ratificiranje ovog protokola.

Gdin Raguž je nadalje, uzevši riječ, rekao da je prethodna suglasnost Komisije za ratifikaciju Okvirnog ugovora o kreditu između BiH i Razvojne banke Vijeća Europe data na prethodnoj sjednici, te da nije bilo potrebno unositi ovu tačku u dnevni red za ovu sjednicu. Gđa Iglica je odgovorila da je ova tačka samo formalno stavljena, obzirom da se nalazi na današnjoj sjednici Zastupničkog doma PSBiH.

Gdin Bogdanović je, u nastavku, rekao da u sadržini Konvencije Ujedinjenih Naroda protiv korupcije nije moguće ništa mijenjati, te da se može samo pristupiti Konvenciji, što je obveza BiH u procesu pristupanja EU. Komisija je dala prethodnu suglasnost za ovu konvenciju, a ujedno i za Konvenciju Vijeća Europe o kibernetičkom kriminalu i Dodatni Protokol Konvenciji o kibernetičkom kriminalu, a u vezi kažnjavanja djela rasističke i ksenofobične prirode počinjenih putem računarskih sustava.

Potom je gđin Bogdanović izložio suštinu Sporazuma o tehničkoj suradnji između Vijeća ministara BiH i Vlade Japana, naglašavajući da je ovo samo formalizacija postojeće veoma dobre suradnje s Japanom, jer je poznato da je Japan jedan od najvećih donatora BiH. Komisija je jednoglasno dala prethodnu suglasnost za ratificiranje ovog sporazuma.

Dakle, zaključujući ovu tačku dnevnog reda, Komisija je dala svoje mišljenje da su ispunjeni uvjeti da Zastupnički dom PSBiH da suglasnost za ratificiranje sljedećih sporazuma i ugovora:

- a) Općeg sporazuma o privrednoj, investicionoj, tehničkoj, kulturnoj, sportskoj i omladinskoj suradnji između Vijeća ministara BiH i Vlade Kraljevine Saudijske Arabije;
- b) Protokola o suradnji između Vijeća ministara BiH i Vlade Republike Turske;
- c) Konvencije Ujedinjenih naroda protiv korupcije;
- d) Konvencije Vijeća Europe o kibernetičkom kriminalu;
- e) Dodatnog Protokola Konvenciji o kibernetičkom kriminalu, a u vezi kažnjavanja djela rasističke i ksenofobične prirode počinjenih putem računarskih sustava;
- f) Sporazuma o tehničkoj suradnji između Vijeća ministara BiH i Vlade Japana.

Sjednica je završena u 13,55 sati.

Predsjedatelj Komisije
Martin Raguž

Zapisnik sa 32. sjednice Komisije sačinile:
Merdžana Iglica, sekretar Komisije

Edina Harbinja i Alma Kurtalić, studenti-stažisti

Kopija: MVP-u BiH